



Plata dla Ploania Al Plan de Mareo San Vighile

Ploian: Signor Klaus Sottsas
E-Mail: ploaniaalplan@gmail.com

Calogna Al Plan: 0474 501006
Radio de Ploania: 93,00 MHz

UNITÉ PASTORALA



VAL BADIA
www.unitepastorala.org

Ann A

08.03.2020 - Terza domëgna de Carsëma

nr. 15



Fora dal vangele:

**La èra samaritana ti á dit a Gejù:
Co póste pa tò sciöche iüda perié me,
na samaritana, do val' da bëre? – Jan 4, 9**

Vigni de incunti y i á da fá cun porsones desvalies.
Co é pa pordërt mi raport cun i atri?



Al te dess ega via...



Dal Vagnele do San Jan 4, 5-42

Te chël tomp ⁵ea Gejù roé t'en post dla Samaria co à ennom Sihar y co ea dlungia chël terac che Iacob ti à lascé ierpè a so fi Ojep. ⁶Danló èl le vistí de Iacob. Gejù ea stanch dal iade y s'á sonté jö pa bronta; al ea encër la sesta ora.

⁷Endertant èl gnü na èra samaritana a ciarié fora ega. Gejù

ti á dit: Damo da bëre! ⁸Sü discepui ea jüs tla ciüté a cumpré val' da mangé. ⁹La èra samaritana ti á dit a Gejù: Co poste pa tò desco iüda perié me, na samaritana, do ega? I iüdes n'á pordërt degüna conferta con i samaritans. ¹⁰Gejù ti á rospognü: Sce te sess, te ci ch'al stá la scincunda de Dio, y che ch'al é chël co te dij: Damo da bëre!, spo l'esste tò perié, y al t'ess dé ega via. ¹¹Ara ti á dit: Signur, te n'as degüna massaria y le poz é sot; da ola aste pa spo l'ega via? ¹²Este pa tò maiú co nosc pere Iacob, co s'á dé cösc poz y co á enstès boiü d'enfora, desco ince sü fis y sü pastorëc? ¹³Gejù ti á rospognü: Chël co bër de cöst'ega, ciafará endó sëi; ¹⁴mo chël co boará de chë ega che iu ti dará, n'ará mai plü sëi. **Parora dal Signur. – Lalt a te, Gejù Crist!**



Enformaziuns y Comunicaziuns



Comun: Le Comun de Mareo lascia alessëi che le zënter dal refodam ta Ciamaor resta por en iade slüt, por gauja dal „coronavirus“

KVV Seniorenclub: Al vën lascé alessëi che le referat dai 18 de merz é gnü desdit.

Enformaziuns y Comunicaziuns



FUNZIUNS TAL RADIO DE PLOANIA

Deache an ne pó fá degünes mæsses y funziuns te dlijia, vègnel lascé alessèi che valgünes funziuns sará empó da aldí tal Radio de Ploania, por Al Plan y La Pli. Ares gñará dites te dlijia, por che düc pói ascuté y perié empara, mo **la dlijia sará slüta, porchèl ne dess la jont nia gní adalerch.**

Domëgna 8:30:	Signor Klaus dij la gran mëssa
Dédolönesc 19:30:	Corona
Dedemesaledema 19:30:	Les Staziuns
Vëndres 19:30:	Les Staziuns

CIAMPANES ENVIËIA AL'ORAZIUN

Te cösta situaziun d'emergënza dal „coronavirus“, á le Vësko Ivo Muser envié da perié por les porsones amarades, por chères co ti stá dlungia, por le personal sanitar y ince por les porsones co á da tó dezijiun por le bën dla jont. Ince la Ploania á orü tó sò cösc envit. Cina che al ne sará nia mæsses y funziuns te dlijia, sona **vigne sèra ales 18:00 por en minut alalungia la gran ciampana y la ciampana dal Ciüch**, por envié la jont da fá en momont de oraziun y perié por cöstes intenziuns, y ince che i gnunse sconés y delibrés dla maratia. Atló na proposta de oraziun:

Bun Dio, i te periun plëns de fidonza che le coronavirus ne feji nia ciamó plü dann y che cösta maratia pói tosc se roé. Scinchi endó la sanité a chi co s'al á tacada y porta pésc te nüsc paisc y tai posc olache ara é roada.

Tol sò te tü brac les porsones co é mortes por gauja dla maratia, consolëia söes families y chi co patësc.

I te periun, dëida le personal sanitar co fistidiëia dai amarés y co fej dles dötes por combater le virus. Tin dalunc da d'èi i prighi.

Benedësc chi co á da tó dezijiuns, chi co laora por ti mëter na fin a cösta emergënza, y acompagnëia chi co se tëm y co vir chisc dis con trica.

Signur Gejú Crist, Tö es le dotur dal corp y dal'anima, iolan por chi co é varis. I se metun te Töes mans, confidenn te To aiüt y tla proteziun de nosta Oma Santa Maria. I te periun che i podunse ince crësce te cösta situaziun, desco porsones y desco comunité. Y che i podunse tosc endó avëi sanité y pésc. Amen!

Aladó de desposiziuns dla Diozeja, sonará dötes les ciampanes adöm, 10 minut alalungia, **vigne domëgna** che al n'é nia mëssa te dlijia ales 12:00, **en Sant Ojep** ai 19 de merz y pla festa dl'**Anunziaziun dal Signur** ai 25 de merz. La comunité é enviada da perié les Anmaries (Agnó dal Signur) y confidé tla Providonza Divina.

Impressum: Ploania d'Al Plan, str. Catarina Lanz nr. 46, 39030 Al Plan de Mareo
Comunicaziuns - cina al dedemesaledema sèra - da mené a: Pablo Palfrader
Tel. **333 4762010** Mail: **ploaniaalplan@gmail.com**
Download plata: **www.unitepastorala.org**